

ABDIAE

Capitulum: 1

CAPITULUM 1

Visio Abdiae haec dicit Dominus Deus ad Edom auditum audivimus a Domino et legatum ad gentes misit surgite et consurgamus adversum eum in proelium

² ecce parvulum te dedi in gentibus contemptibilis tu es valde

³ superbia cordis tui extulit te habitantem in scissuris petrae exaltantem solium suum qui dicit in corde suo quis detrahet me in terram

⁴ si exaltatus fueris ut aquila et si inter sidera posueris nidum tuum inde detraham te dicit Dominus

⁵ si fures introissent ad te si latrones per noctem quomodo conticuisses nonne furati essent sufficientia sibi si vindemiares introissent ad te numquid saltem racemos reliquissent tibi

⁶ quomodo scrutati sunt Esau investigaverunt abscondita eius

⁷ usque ad terminum emiservunt te omnes viri foederis tui inluserunt tibi invaluerunt adversum te viri pacis tuae qui comedunt tecum ponent insidias subter te non est prudentia in eo

⁸ numquid non in die illa dicit Dominus perdam sapientes de Idumea et prudentiam de monte Esau

⁹ et timebunt fortes tui a meridie ut intreat vir de monte Esau

¹⁰ propter interfectionem et propter iniquitatem in fratrem tuum Iacob operiet te confusio et peribis in aeternum

¹¹ in die cum stares adversus quando capiebant alieni exercitum eius et extranei ingrediebantur portas eius et super Hierusalem mittebant sortem tu quoque eras quasi unus ex eis

¹² et non despicias in die fratris tui in die peregrinationis eius et non laetaberis super filios Iuda in die perditionis eorum et non magnificabis os tuum in die angustiae

¹³ neque ingredieris portam populi mei in die ruinae eorum neque despicias et tu in malis eius in die vastitatis illius et non emitteris adversum exercitum eius in die vastitatis illius

¹⁴ neque stabis in exitibus ut interficias eos qui fugerint et non concludes reliquos eius in die tribulationis

¹⁵ quoniam iuxta est dies Domini super omnes gentes sicut fecisti fiet tibi retributionem tuam convertet in caput tuum

¹⁶ quomodo enim bibisti super montem sanctum meum bibent omnes gentes iugiter et bibent et absorbent et erunt quasi non sint

¹⁷ et in monte Sion erit salvatio et erit sanctus et possidebit domus Iacob eos qui se

possederant

18 et erit domus Iacob ignis et domus Ioseph flamma et domus Esau stipula et succendentur in eis et devorabunt eos et non erunt reliquiae domus Esau quia Dominus locutus est

19 et hereditabunt hii qui ad austrum montem Esau et qui in campestribus Philisthim et possidebunt regionem Ephraim et regionem Samariae et Benjamin possidebit Galaad

20 et transmigratio exercitus huius filiorum Israhel omnia Chananeorum usque ad Saraphtham et transmigratio Hierusalem quae in Bosforo est possidebit civitates austri

21 et ascendent salvatores in montem Sion iudicare montem Esau et erit Domino regnum

For other languages please go to **www.wordproject.org**